

四庫全書薈要

• 乾隆御覽本

集部

欽定四庫全書薈要

集部

文憲集卷二十五




詳校官侯補通政司經歷臣郭祚熾

文憲集卷二十五

明 宋濂 撰

行狀 凡四章

故集賢大學士榮祿大夫致仕吳公行狀

  
祖諱聞皇贈中奉大夫福建道宣慰使護軍追封渤海郡公妣盛氏追封渤海郡夫人祖諱蕃皇累贈資善大夫太常禮儀院使上護軍追封渤海郡公妣沈氏追封渤海郡夫人父諱伯紹皇累贈翰林學士承旨榮祿大

夫柱國追封渤海國公妣金氏追封渤海國夫人本貫婺州  
路浦江縣德政鄉尊仁里年八十二

公諱直方字行可姓吳氏初名佐孫後避十世祖諱而  
更以今名其先出自毗陵毗陵吳之延陵乃季子之家  
邑也自時厥後一遷於鄱陽再遷於嚴陵三遷於婺之  
浦陽浦陽北鄙有里曰新田去今縣治二十餘里吳氏  
之先祖家焉其冢猶在大樓山之原歷三傳有一翁始  
生六子其介子公養唐乾寧初又遷縣西吳溪上公養



生伯勝伯勝生文昌文昌生承倚承倚生佐佐生崇崇  
生子琬子琬生嗣明嗣明生元禮元禮生景行景行生  
璣璣生宣慰公聞世隱於農而能以誦詩讀書為務委  
祉垂休有自來矣聞生太常公蕃字衍之以質遷有無  
稍出游梁楚間晚而無子以三從兄迪功郎英之季子  
伯紹為之後伯紹實承旨公一名寶字伯玉公之父也  
公生四歲而渤海郡夫人沒七歲而渤海夫人卒十歲  
而太常公亦捐館舍公獨與承旨公居承旨公寬厚長

者強宗右姓時侵苦之至奪其土田承旨公莫能誰何  
益衰削不振公時雖在童孺痛徹心髓仰天自誓曰彼  
之陵轢我者利其孤幼也予稍長不能揚眉出一語白  
人豈丈夫也哉遂自力於學宗人幼敏家多納名士大  
夫鄉先生方公鳳粵謝公翺括吳公思齊咸寓與處或  
談名理及古今成敗治亂或相與倡酬歌詩公每出侍  
側聞其言有會心處輒記之終身不忘入坐書塾凝然  
如癡也至晚各散去猶執卷呻吟弗輟偶嬰蠱疾諸醫

不能療數至困殆如是者十年人為公危有相者謂曰  
子貌廣貴甚疾且亡害何不游學以暢其懷乎能如吾  
言病不藥而自已公然之乃入郡城習吏事祝帥聞不  
數月其疾果瘳聞錢唐為東南都會而行中書莅焉一  
時人物之所萃復謀往游居數年而莫有用之者公嘆  
曰王侯將相寧有種耶吾殆俟時也此而不遇豈別無  
其地乎於是不告戚姻交友直走京師日與貴公卿接  
所見益恢弘而所守益凝定第困於在下而峻登樞要

者又諱問布衣隻影翩翩於五千里外惡衣菲食或不  
能繼凡歷二十有六年而落魄益甚矣其剛勁不屈之  
氣初不肯少貶以徇流俗或憫公勸其南歸公笑曰生  
為寄死為弃何分冀北與江南乎掉頭去不顧大德中  
會有旨粉黃金為泥書毗盧大藏經禮部選筆札端謹  
者充公在選中以勞當得一官未幾罷延祐初明廟在  
潛邸用大臣薦入備說書已而出幸北藩又罷去泰定  
元年奉省檄為上都儒學正迨之官已為代者所先時

太師德王曼濟台留守灤京聞公氣宇恢廓延而與之語大悅以為南陽諸葛孔明亦不是過因聘入賓館使教其二子長則中書右丞相托克托次則御史大夫額森特穆爾公遂留德王家後德王日益貴顯事有難決者必質問而後行如卜著龜無少爽者德王益敬之過休沐日必與公對語終日德王曰吾與他儒生語輒欠伸思睡今與君言有若聆鈞天廣樂終日而不知倦君誠奇士哉語已熟視公連稱賽銀者再賽銀華言所謂

好也元統二年丞相方執法中臺以公在先朝有講說之勞言於上命為江浙等處儒學提舉與對品階中官難之擬副提舉階將仕佐郎未及上重紀至元二年御史臺改授將仕郎海北廣東道肅政廉訪司承發架閣兼照磨而公年已六十一矣三年遷宣政院架閣管勾四年至官僅三月陞本院長史公盡心弗懈出納惟允中宮數有白金束帛之賜遠國遣使欲獻羣馬以徵求厚價同列以為利爭言之公揣其道塗所經屢涉海洋

非二年不可到縱到馬亦病死不能多力却去之六年  
丞相之從父秦王巴顏方秉鈞軸恃其有定策功專權  
自恣恣變亂舊章出入擁重兵以自衛中外危疑上深患  
之丞相時為御史大夫乃召之問計丞相以謀於家為  
對公曰大夫失言幾事不密則害成矣丞相驚曰謀將  
安出公曰宜亟黜之以謝天下丞相以親嫌辭公曰傳  
有之大義滅親大夫知有朝廷耳家國不宜恤丞相曰  
事不成奈何公曰事不成天也一死復何惜即死亦不

失為忠義耳丞相頓足曰吾意決矣乃入奏久之未敢  
動適秦王侍皇太子出獵柳林丞相欲發公曰皇太子  
在軍中脫挾之以生他變何以處之丞相悟急白太后  
傳旨趣以歸閉京城自守遣使持詔散遣諸軍出秦王  
為河南行省丞相一反舊政民大悅上多公協贊功召  
對便殿慰諭甚至會內臣以玉盤進饌輟以食公特超  
一十餘階授公集賢直學士亞中大夫七年改本院侍  
講學士進階中奉大夫復召入龍光殿錫以黃金束帶



丞相亦自是進位台司國有大事上命必定於公公亦  
慨然以澤被斯民為己任有知無不言言之丞相無不  
行天下翕然比後至元之治於前至元公之功居多然  
公謙抑未嘗與人言故人不可知所可知者其與議中  
書時一二事而已科舉廢已久公力言丞相曰科舉之  
行未必人人食祿且緣此而家有讀書之人人讀書則  
自不敢為非其有繫於治道不小丞相因奏復之二浙  
民食鹽病民為甚其直漸增至數倍民不堪命公為言

之減其額而下其估他如楮幣銅錢相權之宜有司公  
田多科之擾官寺建設之冗繁江南顧役之長利公咸  
一一建白多已見於行事拜集賢學士階資善大夫居  
亡何以年久謝事上章乞骸骨遂以集賢大學士榮祿  
大夫致仕食俸賜終身俄又賜田一千九百餘畝尋謝  
不受先是御史言公躡進官階奪其誥命至是察官辨  
其誣復之公生於宋德祐己亥十一月二十四日庚寅  
薨於今至正丙申七月十二日庚寅享年八十有二以

薨後一月葬於德政鄉後吳山徐塢承旨公之墓左實  
八月十二日庚申也公前娶盛氏先十七年卒後娶金  
李二氏金氏累封渤海國夫人子男二長萊字立夫九歲  
善屬文博通經史百家衆流之言蔚為儒宗文師延祐  
庚申以春秋預鄉薦後用御史察舉為饒州路長鄉書  
院山長四方學者尊之私謚曰淵穎先生亦先十七年  
卒次志道崇文監丞奉訓大夫孫男三長士諤婺州路  
金華縣儒學教諭次士謚次存仁曾孫男三長中次平

次奔曹孫女一申公讀書欲通大義務在力行不屑為區區章句之學其於魯論言忠信及事君能致其身之語尤深有契悟終身言必思踐至於國家有急輒欲忘軀徇之而不以為難經史格言可以斷大事決大疑者皆謹記之故其臨事未嘗少惑善評文詞詞林宗工與公遊者以所草詔令示之公為指其瑕疵極中事情人皆嘆服性尚風義德王夫婦薨公年已八十不憚鯨波之險親往京師行吊祭之禮尤人情之所難公深沉有

謀絕不事表暴人但見其堅凝醇篤有若懦懦不知遇  
事快利若風鶴掠林健颿挾舟以飛也承旨公薨墓碑  
未立丞相欲為奏敕詞臣撰文以遺之公曰先君隱約  
田間少見於事為若挾天子威命以彌文夸侈之固無不  
可是非以誠遇先君也卒辭之乃自疊巨石十五成為  
碑大書所封官號復列幼時辛苦艱難與其自誓之意  
刻諸石陰且謂內曰此吾所以酬素志也公家食將十  
年跼步不妄出終日正衣冠危坐或至夜分未嘗有惰

急客賓至則相與劇談當世之務玉貫珠聯聞者解頤  
方岳重臣仰慕聲光遣使執饋食之禮州縣大夫俯伏  
迎拜唯恐不恭四海之內雖愚夫愚婦亦皆能道公名  
字而公初無自驕之色遇鄉黨有如貧賤時官府事一  
髮不相涉謙從或以惡言加人輒縛致有司杖之生平  
不惑於堪輿家誣誕無驗之說遺言隨地而葬但毋使  
土親膚又以無大功業不必乞銘於人以為識者之所  
訕鄙乃自序歷官世第而系以辭曰余生雖艱非有所

觀漫游京華旅食三紀際時休明偶膺祿仕位躋極品  
恩封三世儒者之榮於斯為至報上一誠如水東注樹  
碑自銘以詔來裔人以為實錄云夫天之生材欲振之  
張之以昌大其文必抑之斂之以培植其本譬之於物  
其榮腴流毫於發生之日者皆出於巖氷霜雪摧折之餘蓋  
養之不厚則發之不茂其勢然也公以惇龐宏碩之資  
蘊康濟經綸之具司造物者特晦之於少齡而顯之於  
耄年其意亦猶是爾故公之施於用也篤固而不搖勇

驚而善斷雖職居散地實密贊化機一反掌之頃國勢  
尊安權姦自是而屏跡政治自是而康乂古之所謂社  
稷臣者於公殆庶幾矣然自聖元混一四海垂及百年  
大江之南韋布之士品登第一而以勞烈自見者豫章  
程文憲公文海吳興趙文敏公孟頫長沙歐陽公玄及  
公為四人或以文章顯榮或以政事著稱事固有殊道  
則一也其沒而不返者既皆有所論述以表見於世公  
其可獨少乎公之子志道及其孫士諤恪奉先戒不敢



乞銘於人以濂嘗受業淵穎先生之門而志道又從濂  
學最久因以事狀惓惓為請濂也不文幸獲受知於公  
雖契家子姓持容以賓禮見義固不敢辭謹采天下之  
人所嘗言者為文一通附諸家乘之末不敢抗之以為  
高按之以從卑唯務稱其實而已他時執史筆者尚有  
攷於斯焉至正丙申八月將仕郎翰林國史院編脩官  
金華宋濂述

故翰林待制承務郎兼國史院編脩官柳先生

行狀

本貫婺州路浦江縣通化鄉胡塘里曾祖蘊妣童氏祖  
補之宋迪功郎嘉興府崇德縣主簿妣金氏考金宋忠  
朗郎高郵軍高郵縣令元贈奉訓大夫淮安路泗州知  
州飛騎尉追封浦江縣男妣俞氏追封浦江縣君

先生諱貫字道傳姓柳氏其先出於有熊至展禽仕魯  
為士師食采柳下因以為姓自後子孫寔盛世家河東  
宋建炎中先生七世祖鑄始從趙忠簡公鼎自河東遷

杭子森復自杭遷婺之浦江森三傳至蘊生崇德縣主簿補之崇德生高郵縣令金高郵先生父也先生素有異質雖未成人時即不苟取嘗隨高郵遊神祠拾人所遺金珠可直萬緡密伺其求而還之高郵驚異甫及冠遣受經於蘭溪仁山金公履祥仁山遠宗徽國朱文公之學先生刻意問辨即能究其旨趣而於微辭奧義多所發揮既又從鄉先生方公鳳與粵謝公翱括吳公思齊游歷攷先秦兩漢以來諸文章家大肆於文開闔變

化無不如意先生曾不自以為足復裹糧出見紫陽方  
公回淮陰龔公開南陽仇公遠句章戴公表元永康胡  
公純長孺兄弟益咨叩其所未至諸公皆故宋遺老往  
往嘉先生之才無不為之傾蓋隆山牟公應龍得太史  
李心傳史學端緒且諳勝國文獻淵源之懿儀章官簿  
族系如指諸掌先生又往悉受其說自是先生之學絕  
出而名聞四方矣國朝大德四年庚子先生年三十一  
始用察舉為江山縣學教諭至大元年戊申遷昌國州

學正江山乃大山窮絕之境昌國則邈焉雲海島嶼中  
先生皆以詩書變其俗考滿至京中書左丞張公思明  
一見輒器重俾諸子師事之當時號為名公卿者爭相  
延譽如恐弗及吳文正公澂嘗語人曰東陽柳君卿雲  
甘雨也天下士將被其澤程文憲公鉅夫以墨一丸授  
之曰文章正印今屬子矣延祐四年丁巳先生年四十  
八銓曹以士論所歸特除湖廣等處儒學副提舉未上  
六年己未改國子助教階將仕佐郎至治元年辛酉陞

博士轉將仕郎諸生敬之如神明其後散之四方幾千  
餘人去為良御史名監司者甚衆泰定元年甲子先生  
年五十五遷太常博士陞徵仕郎時方承平稽古禮文  
之事次第並舉遇有所討論先生為權準古今敷繹詳  
緻廷議莫不多之勲戚大臣請謚者三百餘人文移山  
積先生為之質行定名三月而畢臨江守李侯倜為部  
使者所劾他使者力辨其誣後官至集賢侍講法應得  
謚其子欲入金沒臨江事先生辭之卒明其非罪柄國

者欲以其祖配享孔子廟禮官承望風旨唯恐有忤先  
生毅不可事遂寢有神降於洛郡長吏列上儀曹請錫  
封爵中書下其事先生以為神姦能蠱民不治將亂請  
檄所部禁戢之沅陵歲貢包茅四十餘甌茆輕舟搖押  
行吏多沉江死先生建言請損其三之二附他以輸浙  
東西每三歲更造漕舟民甚苦之舟一滲輒棄不視先  
生白相臣建船司以修治之其當新者聽給沒入賊吏  
錢毋病民會有力沮者不行監察御史馬公祖常薦先

生堪任風憲章再上弗報三年丙寅先生年五十七以  
文林郎出為江西等處儒學提舉龍興郡學久廢不治  
先生請宰府新之延聘名儒孫轍為學者師士風為之  
復振他書院不籍於禮官者亡慮數十其出納布粟從  
提舉署主領一員司之有力者常行貨求檄至則乾沒  
為奸先生盡罷遣分隸所在學官提舉朝夕饘歲進米凡  
八十石皆取於諸生餽廩中先生謝不受後來莫有敢  
追襲其弊者黃冠師建三靈廟以侵學地浮屠據東湖



書院田二百二十畝而羸先生皆為復之葺漢先賢徐  
孺子墓立宋高士蘇雲卿祠古碑碣所紀有關於名教者  
必訪求而重刻之凡可以扶世導民者無不為也豐城  
學徒挾姦以持校官短長時主教者又不知以職自振  
每用計相傾先生各坐以其罪聞者心服南康倉吏坐  
飛糧株連逮繫者百餘家省憲二府檄先生謝其獄先  
生為鈞適隱伏所平反者甚多滿秩而歸杜門不出者  
十餘年完廬數間僅蔽風雨而餽粥或不繼先生處之

裕如也先生雖居崑壑海內仰之猶如魯泰山作鎮海隅莫不以其出處為斯文隆替之候風紀行部必過門承問而去至正元年辛巳先生年七十二朝廷更化徵用老成臺閣近臣有以先生名聞於上者於是有旨以翰林待制承務郎兼國史院編脩官起先生於家先生即冠帶見使者退謂人曰吾今幸親禁近得陳堯舜之道以贊太平之治死不恨矣會貢舉法復行江浙行中書留主文衡二年壬午夏五月至官僅七閱月竟以一

病不起實冬十一月九日而先生年七十三矣省臺

樞府而下皆來歸賻館閣之士至於灑泣集賢大學士

吳公直方國子博士吳公師道與經筵檢討危公素共

經紀喪事御史中丞張公起巖在成均為同僚友至是

哭之尤哀家孫頴奉靈輜南還諸公相與陳奠東門見

者皆咨嗟隕涕三年癸未冬十二月二十一日與夫人

盛氏合葬通化鄉荆山之阡盛氏累遷浦江縣君先十

二年卒子男三鹵同因孫男三柎頴穆柎夭女一所著

書有文集若干卷金石竹帛遺文若干卷近思錄廣輯  
三卷字系二卷藏於家先生局度凝定燕居默坐端嚴  
若神即之如入春風中久與之處未嘗見疾言遽色雖  
有桀鶩者瞻其德容莫不氣奪而意消孝友本乎天性  
季弟實出為人後遇之有恩不規在家者生平以獎進  
人材為己任諄諄勸誘至老不倦人有一善播之惟恐  
不亟士類咸樂歸之讀書博覽強記自禮樂兵刑陰陽  
律厯田乘地志字學族譜及老佛家書莫不通貫國朝

故實名臣世次言之尤為精詳善楷法工篆籀京兆杜公本謂其妙處不減李陽冰為文章有奇氣春容紆徐如老將統百萬雄兵旗幟鮮明戈甲焜煌不見有喑鳴叱咤之嚴若先生者庶幾有德有言為一代之儒宗者矣先生既沒同門友戴良既著哀頌一篇以洩無窮之悲復恐先生之羣行湮沒無以顯白於來世俾濂狀之濂雖不敏受先生之教為深因不讓而蒐羅缺逸評隲成章以附家乘之後雖言之不文幸無媿辭他日太常

特為定謚史官特為立傳尚有采於此云謹狀至正五年十月日門人金華宋濂狀

故翰林侍講學士中奉大夫知制誥同脩國史  
同知經筵事金華黃先生行狀

先生諱潛字晉卿姓黃氏黃為婺名族至宋太史公庭  
堅族望尤著太史之從父昉生景珪俱來浦江景珪生  
琳娶忠簡宗公澤之女弟始遷於義烏琳生中輔力學  
尚氣節當秦檜柄國士有議已者輒捕殺猶奮然題樂

府太平樓上有劔欲斬佞臣頭之語人至今誦之晚以  
轉運使薦當得官命垂下而卒中輔生紹祖紹祖生  
信於先生為高祖迪功郎累贈朝散大夫妣宗氏  
公四世諸孫女累封安人曾祖夢炎淳祐十年進士仕  
至朝散大夫行太常丞兼樞密院編脩官兼權左曹郎  
官以朝請大夫致仕妣陳氏累贈宜人繼方氏祖孀方  
出也以進納恩補承節郎入國朝弗仕今累贈嘉議大  
夫禮部尚書上輕車都尉追封江夏郡侯妣徐氏淳祐

七年進士奉議郎兩淮宣撫大使司幹辦公事彬之女  
今追封江夏郡夫人父鑄以朝請府君遺澤補將仕郎  
今累贈中奉大夫江淞等處行中書省叅知政事護軍  
追封江夏郡公妣童氏承信郎監嘉興府鮑郎鹽場伯  
永女今追封江夏郡夫人夫人姓先生時夢大星煜煜  
然墜於懷歷二十四月以至元十四年冬十月一日始  
生甫晬即自免乳徐夫人抱而育之比成童不妄踰戶  
閭授之以詩書不一月皆成誦迨學為文下筆頃刻數



百言常著吊諸葛武侯辭前太學內舍劉君應龜朝請  
府君之外孫也見而嘆曰吾鄉以文辭鳴者喻叔奇兄  
弟爾是子稍加工不其與之抗衡乎因留受業弱冠西  
遊錢唐前代遺老與鉅公宿學先生咸得見之於是益聞  
近世文獻之澤暨還故居從仙華山隱者方君鳳游為  
歌詩相倡和絕無仕進意其友葉君謹翁力挽之出大  
德五年舉教官七年舉憲吏就試皆中其選已而復退  
隱於家延祐元年貢舉之法行縣大夫又強起先生充

貢鄉闈時古賦以太極命題場中作者往往不脫陳言

獨先生詞致淵泳綽然有古風特寘前列二年上春官

復在選中及奉大對惓惓以用真儒行仁義為言辭甚

剴切讀卷者以其頗涉於激綴之末第奉上旨賜同進

士出身主選吏以為白身補官散階當下二等上命特

與對品階授將仕郎台州路寧海縣丞僅踰再期會有

詔改鹽法江浙行中書承制遷兩浙都轉運鹽鐵使司

石堰西場監運事聞命仍舊階居其職閱四載以功超

一資陞從事郎紹興路諸暨州判官至順二年用故御史中丞馬公祖常之薦入為應奉翰林文字同知制誥兼國史院編脩進階儒林郎丁外憂去官服闋轉承直郎國子博士經六年之久請補外換奉政大夫江浙等處儒學提舉至正三年春先生始六十有七不俟引年亟上納祿侍親之請絕江徑歸俄有旨命預脩遼金宋三史丁內憂不赴除服以中順大夫秘書少監致仕居四歲故湖廣行省平章公多爾濟巴勒令中書左丞相太

平開府公力交薦之被上旨著致仕仍舊階除翰林直  
學士知制誥同脩國史同知經筵事進階中奉大夫九  
年夏四月洊上章求歸田里不俟報而行上聞之遣使  
者追及武林驛敦迫還京復供前職十年夏四月始得  
謝南還行中書為言於朝給以半俸終身公牘已具而  
未及上十七年秋七月令江浙左丞相金紫公達實特  
穆爾方承制司黜陟之柄移書起先生咨議省事以疾  
力辭閏九月五日薨于繡湖之私第享年八十有一學

士大夫聞之俱流涕曰黃公亡矣一代文章盡矣門弟子劉涓王禕宋濂傅藻等咸來相治後事以是月十八日葬於縣東北三里崇德鄉東塋之原距嘉議府君之墓僅十步娶王氏嘉熙二年甲科進士從事郎昭慶軍節度掌書記因金之曾孫文林郎監沿江制置副使司造船場沂之孫將仕郎桂之女今累封江夏郡夫人先一年卒及是始合葬焉子男一人梓用蔭入官初授忠顯校尉紹興路同知餘姚州事女一人適惠州學正陳

克讓俱先卒孫男四人瑄琛璵珣所著書有日損齋初  
葉三卷續葉三十卷義烏志七卷筆記一卷傳學者先  
生在寧海時縣地瀕於鹽場而亭戶恃其不統於有司  
肆毒害民民不敢正視編氓之隸漕司洎財賦府者亦  
謂各有所憑橫暴尤甚先生皆痛繩以法吏懼以利害  
白弗顧也有後母與僧通而酖殺其夫者反誣夫前子  
所殺獄將成先生變衣冠陰察之具知其姦偽卒直其  
冤遠近以為神明巡兵捕鹽販者急遂沈鹽於河帥衆

以拒巡兵怒乃取他私販事以實之民有在盜籍者謀  
為劫殺未行邑大姓執之以圖中賞格初無獲財之左  
驗事皆久不決先生為之疏剔以其獄上各論如本條  
免死者三十餘人部使者董君士恒行縣廉知先生有  
治狀事悉諉焉先生為黜其以賄敗者上百戶一人縣  
吏二人在官無祿者四十餘人愚民以婚田鬪競往訴  
咸下其狀多至數十百先生錄其當問者即不當問者  
遣之先生明習律令世以法家自專者有弗如也凡經

其論定翕然畏服不敢重有辭歲大旱禱於靈湫有白  
龍蜿蜒見湫中已而黑雲四興大雨如注縣以有年在  
石堰視亭場為尤難居是官者常以秤盤拆閱及不能  
檢防私鬻被譴先生規措有法無毫分入於吏議在諸  
暨其俗素號難治先生不加鄙夷壹導以善政民多從  
化捕盜司屋壞撤而改作無敢後期巡海官舸例以三  
載一新費出於官而責足於民有餘則總其事者私焉  
先生適位是役樽節浮蠹以餘錢還之爭驩呼而去奸



民以偽鈔鈎結黨與脅攘民財官若吏聽其詐挾之以  
往新昌嵯縣天台寧海東陽諸縣株連所及百餘家民  
受禍至慘郡府俾先生鞠治一問皆引伏獄具官吏除  
名同謀者各杖之有捕盜卒陰實偽鈔板於良民家乃  
白於官往索之惡少年持挺從者近百人先生遇於野  
詰從吏曰弓卒額止三十安得此曹耶可縛送於州聞  
者遁走有盜繫錢塘縣獄游民賂獄吏私縱之假署文  
牒發兵來為向導逮捕餘二千餘家先生疑而訊焉悉

得其情以正盜宜得重議持偽文書來者又非州民俱械還錢塘誣者自明奉省檄監稅杭州先生御之以寬商旅四集僅閱三月增錢十二萬緡有奇在成均視弟子如朋友未始以師道自居輕納人拜而人來受學者滋益恭業成而仕皆有聞於世時人欲增設禮殿配位四配位合東坐而西向學官或議分置於左右同列不敢爭先生獨面折之其人恚甚日坐堂上以危語相加御史惡其無禮逐去之乃克如先生言在禁林會脩本

朝后妃功臣傳先生為條陳義例多所建明士類服其精允進講經筵者三十有二經筵無專官曰領曰知咸宰執近臣講文之述率屬先生訂定非有關於治道之大者不敢上陳其啓沃之功為多上嘉其忠數出金織紋段賜之始先生嘗預考江浙江西上都鄉試江浙則三往而一主其文衡至是被上旨考試禮部尋又為筵試讀卷官前後所甄拔者盡知名之士先生天資介直絕不事造請逢覃官者一減資者五銓曹或失於收叙

亦不自言在州縣間唯以清白為治一錢不受於民所  
至無圭田月俸弗給每鬻產以佐其費及升朝行挺立  
無所附足不妄登鉅公勢家之門君子稱其清風高節  
如水壺玉鑑纖塵不污先生性篤孝於親親沒營塚於  
三釜山有乳虎馴狎之異山去所廬十里月旦望必展  
省大暑寒不易先世遺文歲久或有殘缺極力搜訪補  
綴成編家居不談米鹽細務與公府短長邑長吏來謁  
鄉鄰有急覲得片言為援輒峻却之尤不輕於薦引或

譏其絕物先生諭曰公朝爵祿將以待賢者豈為吾私  
親設哉先生貴而能貧雖位至法從蕭然不異布衣時  
又寡嗜欲甫臨強仕之年即獨榻於外給侍於左右者  
二蒼頭而已遇佳山水則觴詠其間終日忘去其冲曠  
簡遠之情使人挹之鄙吝頓消與人交任真無鈎距不  
事矯飾以為容悅而誠意獨懇至然剛中少容觸物或  
弦急霆震若未易涯涘不旋踵間煦如陽春曾不少留  
礙焉先生之學博極天下之書而歸於至精有問經史

疑難古今因革與夫制度名物之屬旁引曲證語蟬聯不能休至於剖析異同讞決是非多先儒之所未發見諸論著一本乎六藝而以羽翼聖道為先務然其為禮布置謹嚴援據精切俯仰雍容不大聲色譬之澄湖不波一碧萬頃魚鱉蛟龍潛伏而不動淵然之色自不可犯中統至元以來如先生者三人而已故凡國家典冊詔令及勲賢當得銘者必命先生為之海內之士與浮屠老子之流以文為請者日集於庭力麾之而弗去

一篇之出家傳人誦雖絕徼殊邦亦皆知所寶愛雅善  
真草書人有得其片幅者必藏弔以為榮世之評議者  
謂先生為人高介類陳履常文辭溫醇類歐陽永叔筆  
札峻逸類薛嗣通識與不識僉無間言嗚呼先生生當  
六合混一之時鍾河嶽英靈之氣積之既厚所用亦弘  
仁皇肇開科舉之初即以儒學自奮歷仕五朝晚乃入  
侍今天子掌述帝制勸講經帷巍然獨任斯文之重天  
下學士咸所師法遂使有元之文章炳耀鏗鐫直與漢

唐侔盛先生之功固不細矣至於出處大節尤人所難能者年未七袞而謝事暨羣公力薦起之俄復控辭上方眷待之深再召還朝未幾又辭其難進易退之風真足以廉頑而立懦揆之古聖賢之道蓋無愧也若先生之所自立者豈不綽綽可傳於後哉先生之薨在法當錫謚立傳其從先生游垂二十年知先生為最深因輯任官行事為書一通上於太常國史然巨細詳記不敢效古書法為簡嚴者欲其事之白以俟芟撫也謹狀至



正十年十月一日門人金華宋濂狀

凝熙先生聞人公行狀

公諱慶吉字應之以諱行姓聞人氏相傳出於漢太子舍人通其後裔遷居於蜀有諱韶者為婺之金華縣令遂為婺人縣令生逸孫以儒學教授温州娶王先生詵之女生子號桂山翁翁生始三歲而教授君亡王後去適項氏翁鞠於其家因從其姓及長娶劉侍郎諸孫女而生公乃以公還氏聞人云初鄉先達定庵魯齋二王

公崇尚伊洛之學金鳴而玉應宮奏而商宣倡明道學  
號為極盛翁往來洛邙而得之定庵者為最深翁知公  
有異質父子自為師友晝夜飭厲之公亦上承翁志不  
出郊垞者十年一日有約遊城南者所藏黑履久弗御  
革履為穿故凡七經傳疏悉手抄成帙義理所在深體  
密察微如蠶絲牛毛剖析靡遺積之既久神會心融訓  
詁之說有紛拏不定於一者公別其是非如辨黑白四  
方學徒或執諸經問辨公為歷陳衆義而折衷之不煩

餘力壁猶屠牛坦一朝解十二牛而芒刃不頓君子稱之秦定丙寅公以尚書舉於鄉上禮部不利公無幾微見於顏面益進脩弗懈時有司以解額太嚴不足厭士論別選文理優者為副榜公後連中焉海右憲府知公學行欲辟書吏公辭重紀至元初山東李公綱持部使者節來浙東知公不可吏乃薦為校官初授處學錄轉衢之西安縣學教諭昌國州學正名上銓曹改泉州路學教授某郡李君國鳳方經略江南得承制專封拜君

嘗從公遊知位不稱其德擢為福建等處儒學副提舉  
公力辭朝廷尋以年久當陞除慶元路總管府知事未  
上以壬寅歲三月丁未卒於永康之寓舍上距所生癸  
巳之年凡七十載娶胡夫人無嗣以弟之子亨亨為後  
二女長曰貞適唐壽道說齋之五世孫次曰良適胡裕  
夫人之姪也以是年八月一日權厝於合德鄉之原禮  
也公之學一以誠為本涵養既馴內外一致故其氣貌  
類玄文之玉溫潤而澤絕無纖瑕而乎尹煥發於外者

燿如白虹能令人愛戀弗厭下帷講授前後授學者數  
逾二十各隨其資而裁輔之多有躋膺仕者性行恬沖  
公卿之家意欲邀致每避謝弗往門庭之間草積不剪  
雖當鑠金之暑折膠之寒正襟危坐淵然若有思終日  
未嘗傾側其誨學者必先道德而後文藝故於辭章若  
不經意時而出之文義深鬱亦粲然可觀江左名士鄧  
某以儒者之學自任尤知愛公謂公門弟子曰今時學  
子德未能立而溺志脩辭組織華彩沽釣聲譽實德且

病矣如吾夢吉誠高世之軌範哉人以為知言公既沒  
及門之士以公執醇弗變而含和有耀也私謚曰凝熙  
先生仍告郡太守祠公於學宮前原道書院吳履前進  
士仁和丞唐元嘉從公為甚久猶患粹行不昭於世條  
而列之俾濂銓次成書鏤梓以傳其實無似曩因張教  
授繼之拜公於函丈公一見遇之如子姪所以整攝其  
威儀礪磨其問學者無不至也第以患難相仍業不加  
脩有悖於公之所教又安能道盛德之什一哉雖然不

敢辭也謹用刊落葩藻直序事蹟以俟傳儒林者

諡議 凡四章

深衷先生吳公私諡貞文議

斯文天地之元氣得其正者其文醇得其偏者其文駁世  
之治也正文行乎上則治道脩而政教行世之亂也正  
文鬱乎下則學術顯而經義章斯文之正非謂其富麗  
也非謂其奇俛也非謂其簡澁渙漫也本乎道輔乎倫  
理據乎事有益乎治推之於千載之上而合叅之於四

海之外而準傳之乎百世之下而無弊若是者其惟文  
之正者乎文苟得其正則窮泰何足以累之浦陽深衷  
先生吳公天賦絕人精識邁古咀嚙六經以求其道廢  
歛百家以盡其用貫穿該博洞視當世瑰瑋弘大不愧  
前古其陳理也明而嚴其叙事也精而當其道情也周  
而婉其賦物也深而道年未弱冠志意廓然憤東夷之  
不恭則欲蹈虜庭而陳說覽時政之多僻則欲告時君  
以仁義以聖人之志莫顯於春秋也則排異說而務得



褒貶之中以三代之政莫著於書詩也則畧傳注而務  
得理事之實以亞聖莫盛於孟子也則斥史遷之妄而  
傳之以詞賦之祖莫忠於離騷也則法而式之以古樂  
府之作隨三代而升降也則撰而次之搜抉隱伏擿糾  
訛謬神行電逝川流石止傑乎雄哉先生之於文可謂  
貞而有則矣先生既不喜仕後用薦者為長蘅書院山  
長而終史臣嘗附於元之列傳門人私以淵穎易名或  
竊病其未稱於是更謚曰貞文先生庶使來者知浦陽

之文自先生始大盛而正文之不遇可為當時惜也

故翰林待制柳先生私諡文肅議

天地之運陰陽之化置大和於生物之地置大肅於成物之時蓋豐達茂遂之極非濟之以至嚴則盛者不堅實者不確而發育於春夏者終不足以有成故降之以霜露沍之以冰霰使昔之驕虛暴溢者一旦收斂縮閉折挫而無遺寓深愛於至畏之中萬物莫知其所由然故肅者天地之所以為教也惟人也亦然導之以柔惠誘

之以慈良俾人見之而化者春之和也臨之以儼恪以  
摧其惰慢之氣持之以介正以格其邪僻之心不怒而  
威不言而厲者秋之肅也育才莫善於和成德莫善  
於肅嚴肅之君子其猶霜露之教乎元故翰林待制浦  
陽柳公先生負環雄絕特之才畜峻大剛方之德發而  
為文則沉雄而雅勁見之於行則端重而遂直怠色不  
形於面媚言不出於口所學以聖賢為師而不戾俗以  
為異所志以教化為重而不阿世以為同起為人師入

造胄子周旋禮樂之署統教吳楚之區晚歲就徵入掌  
帝制其於闕異端扶倫紀黜淫祀排勢臣勁氣直辭可  
輔藝訓危言卓行可激貪懦迨其退而燕處凜然神居  
屹然山峙喜怒不著語默有恒可謂有德君子矣先生  
既卒而元亦亡時異典堙節惠之禮未舉門人咸喟歎  
而稱曰士有易名况先生嘗有位者乎惟先生之文天  
下靡不聞知以德配之於義為稱先生之德宏深博大  
茲不敢擬議然表見而易觀者非曰肅乎請遵古者私

謚之例以文肅定謚如何衆咸曰允哉遂謚曰文肅云  
洪武十年春三月己卯朔前某官同縣門人宋某謹議  
淵穎先生私謚議

傳曰物生而後有象象而後有滋滋而後有數數成而  
文見矣是則文者固圓乎天地之中而實能衛翼乎天  
地品裁六度叶和三靈敷陳五彛開道四德何莫非文  
之所為而所謂文者非他道而已矣故聖人載之則為  
經學聖人者必法經以為文譬之於木經其區幹者歟

文則其柯條者歟安可以岐而二之也自史氏失職以  
訓詁列之儒林以辭章書之文苑雖欲昭後世之弊而  
失之古義益遠矣有如長蘅書院山長吳公先生風裁  
峻明才猷允茂漱六藝之芳潤為一代之文英纂述之  
勤汗簡日積於詩書則科分脉絡而標其凡於春秋則  
脫畧三傳而發其蘊於諸子則研覈真偽而極其精於三  
史則析分義例而嚴其斷藻績所及無物不華汪如長  
江峻如喬嶽激如雷電和如春陽其妙用通於造化其

變通莫拘若應龍之不可羈觀其所志直欲等秦漢而  
上之凡流俗剽竊無根之學孱弱不振之章皆不足闢  
其藩垣而逐其軌轍者也嗚呼盛哉門人學子僉曰經  
義玄深非淵而何文辭貞敏非穎而何於是私諡曰淵  
穎先生云門人金華宋濂等謹議

凝熙先生私諡議

泰蘇之氣絪縕盤薄於堪輿間沛為甘澤凝為卿雲發  
為三秀醴泉產為祥麟威鳳及其鍾於人也為慈祥豈

弟之君子足以儀世而導俗足以惇薄而還淳其為邦  
家之華道術之寄蓋甚不細也有若金華聞人先生以  
惇龐之資卓絕之識屏去流俗凡近之見期造正大高  
明之庭言其植志則以三德六行為本原而涼偷之事  
弗為也言其講學則以四書五經為標準而非聖之書  
不習也言其攻辭則以文字從職為載道之用而斤鈎  
章棘句為非學也言其訓人則以真實不欺為凝道之  
端而指出口入耳為小夫也由其淵源深而培養厚故



其功用茂而運量弘毅鐸所臨矜佩翕集得諸觀感之  
際丕冒薰蒸之中由是沖鬯其性情由是陶鎔其氣質  
粹矣成德之彥歸諸果行之功若非碩學之敷施曷收  
醇儒之效驗如此也以此觀之其守道之篤獨立弗遷  
不亦疑乎其光輝昭著由內達外不亦熙乎謹用合辭  
私謚曰凝熙先生庶幾可以景行先哲而嘉惠方來云  
爾門人同里宋濂吳履等謹議

雜著 凡七章

弔忠文

弔忠文者為豫章新建黃君翊作也夫人臣盡忠事君之常經也忠其可弔乎使忠可弔則世之不忠者有可憾焉矣黃君字孟翔其名也通春秋工於屬文每以奕葉為儒錚錚思自見會進士科罷去作江西部使者屬亡何又棄去司計廬陵學官滿一考冀可循例補校官廷議改法以錢粟吏不可為人師更辟大府掾君不得已受事廬陵郡君性剛勁不可回撓事礙於法輒抱

案歷階而升摘其語與上官議反覆相鈞連上官怒斥之屹立不少動已而卒如君言安成土豪暴甚州縣畏之如鬼一旦殺人上下相目莫敢逮同列嫌君木強嗾君行豪樹柵自固君命拔去抵其門惡少年數十執刃譁而出君叱曰爾欲反邪少年曰反則不反汝足稍前即剗汝腸矣君曰爾主自殺人何與爾事顧乃同族滅耶少年色動君挺身呼而入曰爾即殺我爾即殺我少年皆投刃走君趨坐堂上索豪豪知事急出見君求解

且誘以重賂君陽諾之與其俱來寘諸法人見君咸戟  
手指曰此健吏不可犯也至正壬辰大盜起蘄黃將及  
郡郡二千石與官屬皆雲散烏逝君獨止孔子廟堂盜  
獲之知其為府掾強之仕使行官書君罵曰死狗奴我  
死即死其能官於賊耶盜怒反接於樹厯一日意其自  
悔抽刀礪頸曰從則祿汝不從則血浣吾刀矣君大罵  
愈於初賊斫首而去嗚呼事君竭忠固以死繼之然亦  
視其位之何如耳當是時統制閫外者宜死之專城而

居者宜死之荷戈禦侮者宜死之然皆未嘗死君以一  
府掾之微可以不死也即不死物議當不及乃能瞋目  
詈賊視死如歸使其當前三者之任其激揚奮厲足以  
有為可知矣此不為而彼為之悲夫君之子載以文學  
擢第奉常間拜予泣道君事請為文然君之死孰不以  
為忠至其從容就義則鮮有察其詳者予因造文一首  
托之楚聲纏綿悲愴以白君之情君雖在九泉必當以  
予為知己使世之不忠者讀焉其亦有所媿夫君之友

廬陵蕭彝翁鄉貢進士也參謀軍事於省府偽漢陷廬  
陵赴井死婦弟同縣鄧椿為臨江府吏臨江陷椿集廬  
陵義軍千百濟以舟楫萬夫長楊瓚等與賊大戰城下  
三日兵潰投江死其志與君同俱人傑也法宜牽聯得  
書其文曰繫委質以事君兮秉忠貞而不隨斯天經與  
地義兮位無間於尊卑當海嶽之塵昏兮鼓腥風於干  
戈譬巨瀦之失防兮泛搖搖之大波悲何山之不懷兮  
復何陵之不襄舞魚龍而跳象罔兮孰舉手以遏其狂

倚長劍於天外兮豈予力有不任瞻九關之莫通兮誰  
屬予以三軍矧秘計之屢出兮復掩耳而不余聽婦人  
難與圖謀兮徒有淚以沾膺慟哭而叩蒼旻兮予張張  
而安之或危慮而無所騁兮將誓死以為期胡妖氛之  
日熾兮絳帕首而狂呼冠切雲而佩葱珩兮棄堅城而  
長遁予雖賤為府史兮頗嘗與於祿食縱一粟其亦君  
恩兮敢曰職卑而莫卹毀車殺馬而遐逝兮人孰得而  
非予君有急而臣背去兮其自揆為焉如彼王蠋本齊

民兮雖君祿有不享尚一死以報君兮植後世之大防  
況予結髮而好脩兮聞聖謨於父師臨難而求苟免兮  
非禽獸而須眉予豈異夫人兮甘惡生而樂死唯殺  
身以成仁兮免君子之所鄙魏煌之宮牆兮實宣尼之  
秘祠亟攝衣以從之兮依嘉樹之嵒嵒中心皎如白日  
兮即萬死其奚惜與淵騫游於地下兮亦予情之深懌  
瞑目而詈賊兮經百折而弗變卒從容以就義兮誠遺  
言之堪踐爾死固若傷天兮凜萬世而猶生較喪節而



久存兮歷百齡其何榮吾知爾精魄之攸化兮下醴泉  
而上卿雲之二物固為休禎兮豈爾心之所訢必震盪  
為風霆兮叱列缺以施鞭殛不忠而為齏粉兮使天威  
之昭宣嗟鄧蕭之二生兮眼見義而不見水宜與爾為  
三忠兮享百世之明祀悼余生之蹇蹇兮力不足以振  
之悲風蕭蕭而四來兮謾含哀而陳辭

蔗菴述夢文

為東陽胡先生作

龍集壬申瑤光西指火烏戢羽鬱華罷御明河垂兮近

人秋影高兮在樹時有東白仙人弄丸餘暇下蘭庭登  
雲榭遡涼風蕪芳濯望太濛兮何極發雅歌於清夜歌  
曰絳節兮白肪神津布兮流漿隔秋水兮渺予懷招美  
人兮翠環房歌已就寢還天未曉白間吐影霓屏微安  
襲瓊露之方溥謝缸花之半墮何蟬蛻於泥丸兮憑風  
馬而遐遊隨明月於華胥兮羌孰蝶而孰周指帝清之  
廓落兮俯銀漢於下流習弭節於山椒兮神怳怳而莫  
予留則有洞靈之館真游之府四袂薦芬五芝浮礎彩

入綺疏丹開曼宇壁借璽兮流霜程方潤兮靈雨圍八  
角之流蘇障九翎之葆羽中有室之嚴密兮蔚玄蔭之  
紛綖積浩翠於青空疑或有而或無禽藏文於五苞樹  
潛翬於三珠錫芳題於蔗菴懸粉榜之舒舒彼瀛州之  
神人縈玄冠與縞衣施長鞶兮凝藍挾雙佩兮瓊琚勢  
續繡其並徠持白雲以贈予指殊庭以相告謂君子之  
攸居言訖而逝剛籟遄舉虛瀨中肌神爽開寤耿銀燈  
之猶青見蟾華之在戶欲重往以覓之兮杳不知其所

止苟遽舍以為幻兮又予目之所覩心孤疑以至旦兮  
竟不識為何祥也爰有事於玉靈兮乃吉繇之所彰也  
稽嘉植之孔芳兮毓火精於南離絕玉文之瓶棗蹴紺  
澤之水圭秦尊初泛霜肥漢液寶刀新割艷動吳腴漱  
華池之香涎流丹醕之甘滋潰文園之渴城沃虎頭之  
痴脾樹明德以及物兮將立應以勗之安晚節於穆貞  
兮若茹醴而含飴於是嘉名立曲房闢縹帙敷青氍列  
麟室曉移洛塵春寂但同符於昔夢任仙凡之迥隔苟

心目之若存即異境之超絕何實何虛非存非滅聆簷  
馬之夜語恍芳卿之下謁宜收視於三庭生皓英於神  
白吹鳳笙兮歸來風脩脩兮將夕擲萬彙於一幻兮曾  
何間乎今昔羽衣化而鶴神兮楚蕉迷而鹿失世何往  
而非夢兮咲倚琴而秋泣雖不變者之長存兮恨飛鴻  
之遺跡乃歌曰碧藍無塵夜向闌仙子持節來姍姍靈  
泉濯翠色可餐冷光迫人粟花漫何以錫之紫琅玕琅  
玕有節不可屈食之素潘甘如蜜仙人之壽同金石只

此長生便有期却勝人參五葉齊

誥皓華文

龍門生閒居累日弗懌雖深自寬辟卒未能釋去頗聞  
道家之言肺神皓華者實主憂因假為問對作誥皓華  
文以自遣文曰上章因敦在旦之月火雲不移積氣煖  
熱時龍門生黯慘弗悅顏面腫瘡情神鬱勃頴文九折  
麋梁雙闕首不暇冠足何能襪其友亡羊先生哀之謂  
匡山君曰龍門生病矣為祆所嬖矣其中枵枵神喪守

矣匡山君曰花妖媚武園崇惑赤仇鐸投繯荀伯赴溺  
移昭入幽倒白作黑不遑其遂卒實靈龜龍門生之所  
罹殆此疾也邪亡羊先生曰不然也彼自外入有隙斯  
室此自內出無罅可遏昔者玄靈錫真黃苞承鈞膠膠  
者人分為五神守靈威明龍烟育嬰或喜而眉揚或怒  
而色頰或恐而湮淪或思而纏縈各隸攸司別域異局  
中有皓華其字虛成西方之英白虎之精於時為秋擘  
斂華榮於音為商肅殺之聲於行為金厥德維刑於歲

為肺百憂所城寨之無迹迫之不驚歛爾水集忽焉雲  
凝眊眊黑昧呶訾鈴竈久而弗革或爽厥真余嘗遇河  
上丈人於龍都之山九陽之庭授我以帝青之錄示我  
以赤水之經劾召五鬼麾斥三靈動為山合怒為霆崩  
即將召皓華而訊之不亦可乎匡山君曰子計誠良矣  
亡羊先生乃仗七星之劍曳三辰之旌灌酒於茅牖管  
上升禹步成罡拔髮為兵左叱右顧潛聽於冥涉炊五  
斗黍頃迴飈怒旋冷氣四興幻陽變陰弄晦閃明勃律



嬰卒如見其形有媿一夫素裳影纓衛以刀戟載以輜  
輶踉蹌而前噉謂亡羊先生曰我皓華之神也與夫子  
人鬼異程曷名我為亡羊先生曰龍門生之疾爾奈何  
崇之吾之召爾非苟然也寓形兩間為生幾何擊石火  
起流陽電過俄頃歇滅不樂則那既有良朋相與嘯歌  
上下角逐西東夏摩筵陳笙磬尊列象犧酣嬉淋漓屢  
舞傴僂雞虫失德鳩鳳少多棄而不辨遑恤其他孰不  
志舒孰不顏醜孰不鬯遂孰不婆娑爾何使龍門生感

感沕沕姁姁嬰委榻弗振如蝕沈疴爾當據情以對  
其辭若直吾將爾為式辭或不能良我劍有銘皓華聞  
已頽然怒曰夫子藝周載籍心統又天在古無上在今  
無前電生目底雷捲舌間雄章欲議彈壓神姦夫子宜  
先天下憂而憂乃欲自樂邪惟昔尼父任道為宗上畏  
天命下悲人窮雖不得位唯世是從敢曰自佚以疚厥  
躬子幸我聽請竭始終民吾同類綏之匪易遑遑齊魯  
棲棲宋衛樹伐蒲園絕糧不繼車轍周環曾莫少避欲

興東周拯我民瘁是謂世憂夙夜罔替天下為公道紀  
攸繫魚爛已成河決安治傷麟曷來嘆鳳不至舍瑟長  
吁反袂拭涕述為藝經表我王制是謂道憂唯恐淪墜  
夫子法尼父者也宜為二者深憂乃欲自樂邪況今六  
合雄吞矛縱戟橫千里蕭條土絕播畊屍骸如山悲風  
往還烏鳶見人飛集樹端夫子不為之長慟日欲開口  
笑樂一何感乎亡羊先生輒然笑曰爾望吾以聖人之  
事我病未能若謂生民遺屯則有肉食者存吾亦何知

馬古今一馬天地一指死生一轍彭殤一軌溟滓無末  
恢落無始神光下燭人麤將弭內已若忘外憂自止我  
額弗感我齒長啓我神孔寧于胥樂只爾固欲反之將  
有說耶抑罔我也皓華曰大道陵夷始有眇周放言如  
雲彌布八丘蛟龍騰驤搏之無由狎聖侮賢漫漶弗收  
欲齊失物強名弗憂夫子取之人將見尤且吾聞之王  
公弗憂四國不治侯伯弗憂庶政用廢子男弗憂名毀  
身隨士庶人弗憂留害是懼是憂者羣善之原衆德之

基脩之則安悖之則危故曰生於憂患死於安樂而君子終身以之夫子奈何棄諸粵自古初有天皇焉幹運日月輶輶坤乾司執神機主宰帝權懼民多欲志因物遷特遣天老命厠五官蹈揚金德專主憂患以助人極以拓化原夫子辱我以崇並觀如此尚有識邪亡羊先生曰爾言固善古之聖賢有無憂者矣有知命樂天者矣有遯世無悶者矣若是彼皆非歟皓華曰夫膠柱不可以調瑟刻舟不可以求劍尚矣事雖有常亦貴變通

苟執於一子莫之中憂樂有異時勢不同使古聖賢生  
於當今其有隱憂又將何如也言既畢化為白氣其長  
如虹昏昏蒙蒙歸於太空亡羊先生退謂匡山君曰皓  
華之辭良直吾敢不敬承以為式於是攢眉入室寢淚  
欲滴撫物傷懷終宵太息

洛目童文

走也病目視不及尋簡禮越度速僞招刺乃抽隱思引  
物婉義作洛目童文其文曰洛爾童子我目之精凝媿

五神配合三靈素質西皓圓暈東青南丹注背北玄孕  
睛約束臉胞黃中之英氣幾內動歲系外徵啓闢人牖  
通洩天明聚為根蒂數為華榮衆咸允賴爾獨失貞孰  
不若電洞觀八紘爾於只尺不分五牲誰不如月照徹  
七經爾賴湊几僅辨一丁此明而執孰眎弗迎彼不面  
識反揖而承頰或自泚顏常發賴辟如水母藉蝦始征  
又如野狼挾貍則逞皆爾弗職以玷我形童子曰噫何  
言之戾賦授自天初無恒制堯眉八彩岳黃以毳聃耳

無輪慎額斯贅尼口類海敦陜且銳澤鼻如蝎欽直而  
細四者猶殊目胡不異或牟其參表厥明叡或角而方  
遐舉長世或瞭而揚或眊而翳壹囿於玄我則何繫矧  
子淫書膏焚畧繼摛辭藻搜剔文藝肺鏤肝雕心鉢  
腎剗我剗我揉我斲我弊入廓注邪五輪受厲靡精弗  
喪有明益瘞我合子躬如左右契子榮我尊我趺子盤  
豈圖子玷成此左計咨爾童子爾辭固臧傳以正理則  
涉于涼形雖異賦爾宜自強何取其窳乃釋其良書淫



所致尤墮意量冬映雪席夏聚螢囊刺股流血懸髻于  
梁未聞其目遽縮晶光是謂遁辭君子所襄星野有舍  
雲漢成章測步幽眇挈度機祥為爾之故不知低昂三  
條占限兩戒畫疆氣勢旁薄民物浩穰為爾之故足不  
及行述此二端餘可類詳尚飾巧言陳法列方孰為曲  
直敢矯而亢童子曰噫士貴自謀匪姦足恃唯道是道  
考亭有熹廬陵則修厥視雖短所履孔優一紹道緒上  
邇魯騶完經翼傳衣被九丘一昌其辭出孔入周有光

赫艷昭若參游子不此即而反我仇椒蜂彌豹豈無炯  
眸鼓辭樂禍腥聞不收偃瞻文眇世所嘲咻內美之章  
玉瓚黃流子苟弗悟自貽大郵何河而厄何漆以休何  
青以謗何肉而囚子勿寘思芬若繭抽遺形全智與造  
化游我雖俚言實為遠猶毋慚墨墨成此綵綵童子言  
已我心之疚蒙俱既寢斷蓄亦陋植緒太纖削瓜匪秀  
號尊聖哲名亘宇宙非形之妍唯德之茂況目在形賓  
筵一豆雖眊非瞽物亦云覲縱瞽焉尤有用輒售朦腴

三品備予樂奏國語成書事明若晝矜察秋毫或速殃  
咎潛曜自將神腴內富五色免惑一誠自守幸遂遵養  
庶絕馳驟禍福倚仗理嘗易究所憂忘荒如管四酎本  
實不培植葉巧湊弗別秀禾徒煩薊耨童習固動白紛  
罔就千古居前萬世在後虛生其間冠裳猿狖自今伊  
始啓矇撒覆責躬靡遑敢目之詬我道之凝我學之懋  
上慎旃哉吾言不又

逐鷄文

蚊害物蟲也凡有血氣者恒病焉然其所化不一江南有子孓生洿水中好屈伸水上見人泳去久則蛻為蚊此蟲化也塞北有蚊母草草楸而蚊變嶺南有蚊子木實如盧橘熟則綻蚊出實空此草木化也江東有蠱母鳥生池澤茹蘆中形類烏鷄而大黃白雜文鳴如鴿每鳴吐蚊一二升此禽化也爾雅淮南子李肇唐史補陳藏器本草注頗載其事以予觀之四類之中唯蠱母出蚊特夥蠱母鷄也予因作逐鷄文使鷄可逐也則人之

胎既戕物者其知所警也夫其文曰來汝鷦上堪下與  
萬物並育各全其生以蕃以族翬飛繽繡蠕動感劬鱗  
介潛淵毛蹄藏陸文華璀璨形模繚曲游泳同嬉喊呀  
相逐既拘於氣曷禁夫欲大或啗小衆將壓獨唯類之  
求於人敢觸來汝鷦相度爾生厥形甚微賦質黝昧樂  
生穢草啄磔蠹蛤捕索鼃魚含蓄倖反軒露堀竒非疾  
噉嘔無疾唾洩產醜銜惡朝息夕孳不胎而凝憑化而  
馳不卵而孕與涎相依初若蠢萌漸則奮飛來汝鷦爾

腸刀鏃爾胃芒刺不爾之虐所出曷異鳴如雷殷聚若  
雲翳緣撲騰肌嗜噉口呬投間抵隙潛察默覷體如粟  
眇吻若錐利中有豹脚勢尤可畏高沙斃女西洋死吏  
艾熏徒力羽扇不避我人尚然矧彼物類來汝鷄物豈  
無嘔與爾不同鬼口出子一氣之從驢噉吐絲局厥異  
封鳥能嗽金昆明所鍾雞或懸綬色眩黃紅惟爾肆孽  
胎此禍死草木所化洿水是宮無若汝慘厥害則鴻子  
今逐爾欲滅爾蹤嗚呼我挺之將兮其長婉孌爾鷄我

逐兮亟去勿留往彼北荒兮其土幽幽鬼物披攘兮豺  
兕呶嘍爾宜吐蚊兮齧彼若仇胡宅中土兮自貽大郵  
我逐爾鵩兮下民用休鵩既逐兮梧桐晞關下徠  
兮鳴聲噦噦

文原

昔余諱人以文生相命丈夫七尺之軀其所學者獨文  
也乎哉雖然余之所謂文者乃堯舜文王孔子之文非  
謂流俗之文也學之固宜浦江鄭楷義烏劉剛及楷之

弟栢嘗從予學已加以道為文因作文原二篇以貽之  
其上篇曰人文之顯始於何時實肇於庖犧之世庖犧  
仰觀俯察畫奇偶以象陽陰變而通之生生不窮遂成  
天地自然之文非惟至道含括無遺而其制器尚象亦  
非文不能成如垂衣裳而治取諸乾坤上棟下宇而取  
諸大壯書契之造而取諸夬舟楫牛馬之利而取諸渙  
隨杵臼棺槨之制而取諸小過大過重門擊柝而取諸  
豫弧矢之用而取諸睽何莫非粲然之文自是推而存



之天衷民彝之叙禮樂刑政之施師旅征伐之法井牧  
州里之辨華夷內外之別復皆則而象之故凡有關民  
用及一切彌綸範圍之具悉囿乎文非文之外別有其  
他也然而事為既著無以紀載之則不能以行遠始托  
諸辭翰以昭其文畧舉一二言之禹敷土隨山刊木奠  
高山大川既成功矣然後筆之為禹貢之文周制聘覲  
燕享餽食昏喪諸禮其升降揖讓之節既行之矣然後  
筆之為儀禮之文孔子居鄉黨容色言動之間從容中

道門人弟子既習見之矣然後筆之為鄉黨之文其他  
格言大訓亦莫不然必有其實而後文隨之初未嘗以  
徒言為也譬猶聆衆樂於洞庭之野而後知音聲之抑  
揚綴兆之舒疾也習大射於矍相之圃而後見觀者如  
堵墻序燕之揚解也苟踰度而臆決之終不近也昔者  
游夏以文學名謂觀其會通而酌其損益之宜而已非  
專指乎辭翰之文也嗚呼吾之所謂文者天生之地載  
之聖人宣之本建則其末治體著則其用彰斯所謂乘

陰陽之大化正三綱而齊六紀者也。亘宇宙之始終類萬物而周八極者也。嗚呼！非知經天緯地之文者惡足以語此。其下篇曰：為文必在養氣。氣與天地同苟能充之則可配序三靈。管攝萬彙。不然則一介之小夫爾。君子所以攻內不攻外。圖大不圖小也。力可以舉鼎人之所難也。而烏獲能之。君子不貴之者以其局乎小也。智可以搏虎人之所難也。而馮婦能之。君子不貴之者以其驚乎外也。氣得其養無所不周。無所不極也。攬而為

文無所不參無所不包也九天之屬其高不可窺八柱之列其厚不可測吾文之量得之規燬鬼淵運行不息基地萬幾纏次弗紊吾文之欲得之崑崙玄圃之崇清層城九重之嚴邃吾文之峻得之南桂北瀚東瀛西溟杳渺而無際涵負而不竭魚龍生焉波濤興焉吾文之深得之雷霆鼓舞之風雲翕張之雨露潤澤之鬼神恍惚曾莫窮其端倪吾文之變化得之上下之間自色自形羽而飛足而奔潛而泳植而茂若洪若纖若高若卑

不可以數計吾文之隨物賦形得之嗚呼斯文也聖人  
得之則傳之萬世為經賢者得之則放諸四海而準輔  
相天地而不過昭明日月而不忒調變四時而無愆此  
豈非文之至者乎天德湮微文氣日削騫乎外而不攻  
其內局乎小而不圖其大此無他四瑕八冥九蠹有以  
累之也何謂四瑕雅鄭不分之謂荒本末不比之謂斷  
筋骸不束之謂緩旨趣不超之謂凡是四者賊文之形  
也何謂八冥許者將以賊夫誠擿者將以蝕夫園庸者

將以混夫奇瘠者將以勝夫腴穉者將以亂夫精碎者  
將以害夫完陋者將以革夫博昧者將以損夫明是八  
者傷文之膏髓也何謂九蠹滑其真散其神糅其氛徇  
其私滅其知麗其蔽違其天昧其幾爽其貞是九者死  
文之心也有一於此則心受死而文喪矣春葩秋卉之  
爭麗也鵠號林而蛩吟砌也水湧蹄涔而火炫螢尾也  
衣被土偶而不能視聽也蟻蠓死生於甕盎不知四海  
之大六合之廣也斯皆不知養氣之故也嗚呼人能養

氣則情深而文明氣盛而化神當與天地同功也與天地同功而其智卒歸之一介小夫不亦可悲哉

予既作文原上下篇言雖大而非誇唯智者然後能擇焉去古遠矣世之論文者有二曰載道曰紀事紀事之文當本之司馬遷班固而載道之文舍六籍吾將焉從雖然六籍者本與根也遷固者枝與葉也此固近代唐子西之論而予之所見則有異於是也六籍之外當以孟子為宗韓子次之歐陽子又次之此

則國之通衢無荆榛之塞無蛇虎之禍可以直趨聖  
賢之大道去此則曲狹僻徑耳犖确邪蹊耳胡可行  
哉予竊怪世之為文者不為不多騁新奇者鉤摘隱  
伏變更庸常甚至不可句讀且曰不詰曲聲牙非古  
文也樂陳腐者一假場屋委靡之文紛糅龐雜不見  
端緒且曰不淺易輕順非古文也予皆不知其何說  
大抵為文者欲其辭達而道明耳吾道既明何問其  
餘哉雖然道未易明也必能知言養氣始為得之予



復悲世之為文者不知其故頗能操觚遣辭毅然以  
文章家自居所以益摧落而不自振也今以二三子  
所學日進於道聊一言之

畫原

史皇與蒼頡皆古聖人也蒼頡造書史皇制畫書與畫  
非異道也其初一致也天地初開萬物化生自色自形  
總總林林莫得而名也雖天地亦不知其所以名也有  
聖人者出正名萬物高者謂何卑者謂何動者謂何植

者謂何然後可得而知之也於是上而日月風霆雨露  
霜雪之形下而河海山嶽草木鳥獸之著中而人事離  
合物理盈虛之分神而變之化而宜之固已達民用而  
盡物情然而非書則無紀載非畫則無彰施斯二者其  
亦殊途而同歸乎吾故曰書與畫非異道也其初一致  
也且書以代結繩功信偉矣至於辨章服之有制畫衣  
冠以示警飭車輅之等威表旗旐之後先所以彌綸其  
治具匡贊其政原者又烏可以廢之哉畫繪之事統於

冬官而春官外史專掌書令其意可見矣况六書首之以象形象形乃繪事之權輿形不能盡象而後諧之以聲聲不能盡諧而後會之以意意不能以盡會而後指之以事事不能以盡指而後轉注假借之法興焉書者所以濟畫之不足者也使畫可盡則無事乎書矣吾故曰書與畫非異道也其初一致也古之善繪者或畫詩或圖孝經或貌爾雅或像論語暨春秋或著易象皆附經而行猶未失其初也下逮漢魏晉梁之間講學之有

圖問禮之有圖烈女仁智之有圖致使圖史並傳助名  
教而翼羣倫亦有可觀者焉世道日降人心寢不古若  
往往溺志於車馬士女之華怡神於花鳥蟲魚之麗游  
情於山林水石之幽而古之意益衰矣是故顧陸以來  
是一變也問吳之後又一變也至於關李范三家者出  
又一變也譬之學書者古籀篆隸之茫昧而唯俗書之  
娑媚者是耽是玩豈其初意之使然哉雖然非有卓然  
拔俗之姿亦未易言此也南徐徐君景暘工書史善吟

古今詩信為才大夫也旁通繪事有士韻而無俗姿一時賢公卿皆與之游名稱藉甚有薦於朝者景暘以母老不仕予尤愛景暘者於其別去故作畫原以贈焉嗚呼易有之聖人有以見天下之赜而擬諸形容象其物宜是故謂之象然象之事又有包乎陰陽之妙理者誠可謂至重矣景暘其亦知所重乎哉



文憲集卷二十五



總校官庶吉士臣侍 朝

校對官助教臣金學詩

膳錄監生臣蔣如荃